

F I D E S ¹⁹
 THEOLOGORUM
 BELGARUM
 A S S E R T A
 A D V E R S U S
 MENDACIUM NOVUM

QUOD NUPER IPSIS IMPEGIT

M. STEYAERT V. A.

ACCUSATOR FRATRUM SUORUM ANTIQVUS.

Scripti hujus Materics.

M Iratur indignans Belgium, quod vir tot calumniis antiquis & novis infamis, calumniâ novissimâ *Mendacium novum* affingere non erubescat Belgis Theologis, quorum hætenus fides & integritas Urbi & Orbi probata est. Quid? Adeone putat se posse mundo illudere, ut *Mendacium* impudenter clamando omnem calumniarum suarum memoriam ex animis hominum subito deleat, & infamiam, quâ ipse laborat, in alios totam transfundat? Efficiam ego ut omnes intelligant, fidem quidem Theologorum Belgarum *novi* illius *Mendacii* fictione labefactatam non esse; Accusatorem verò antiquum tot olim calumniis ipsum sibi fidem ademisse, ut ab omni deinceps tribunali arcendus sit, & ne ad accusandum quidem amplius admittendus.

Fides Theologorum Belgarum adversus mendacium novum asseritur.

I.

Mendacium à M. Steyaert Belgis Theologis impactum.

Theologi Belgæ in *Confutatione Memorialis Patris Parazol* pag. 24. ubi probant Breve Apostolicum datum 6. Februarii 1694. intelligendum esse tam de officiis & muniis *obtinendis*, quàm de *obtentis*, inter cætera argumenta hoc etiam adjiciunt: *Accedit quod cum eandem illam cavillationem in Schola Lovaniensi tractare non desineret Doctor Steyaert; jam pridem silere ex Urbe jussus sit & Breve Apostolicum tam de officiis & beneficiis obtinendis, quàm de obtentis intelligere. Si de hoc dubitet Parazolius; Doctorem Steyaert interroget: non poterit hic factum Belgio notissimum negare. MENDACIUM hoc esse omni luce luculentius clamat Doctor Steyaert: sed more suo eum calumniari ostensum imus.*

II.

*Ex factis certissimis & toti Belgio notis impacta Mendacii
calumnia refellitur.*

I. Certum est Doctorem Steyaert sæpius in Schola Theologica Lovaniensi contendisse, Breve Apostolicum, ubi agit de non repellendis *prætextu Jansenismi* ab officiis, muniis &c. nisi qui *servato juris ordine* eam pœnam *commeruisse probati fuerint*; intelligi debere de officiis jam *obtentis*, non verò de *obtinendis*.

2. Certum est etiam Alium quemdam, cui Doctor Steyaert in hac causa conjunctissimus est, tum verbo tum scripto idem contendisse & declarasse in Urbe.

3. Certum est præterea atque in Urbe & Orbe notorium, Extraordinariam super hac quæstione Eminentissimorum Cardinalium Congregationem indictam fuisse. 4.

4. Actandem per famam publicam ex litteris die 28. Julii 1696. Româ ad præcipuas quasque Belgii civitates missis, ubique divulgatum fuisse, quod Congregatio illa Extraordinaria declarasset, Breve Apostolicum ad Episcopos Belgii 6. Februarii 1694. datum per omnia observandum esse; neque tantum cum promotis ad Ordines sacros, beneficia, aliaque munia Ecclesiastica, sed etiam cum promovendis procedendum esse servato juris ordine. Et plura quidem requiri, ut expellantur promoti, quam ut repellantur promovendi; sed & circa hos à jure provisum esse: nimirum, ut si ob suspensiones repellendi sint, non repellantur nisi ex suspicionibus juridicis, & cum quadam promovendorum infamia publicis. Quod postremo etiam in ipso Breve Apostolico non obscure expressum est hisce verbis: *Nisi prius suspectum esse LEGITIME constiterit &c.* Equidem, *legitimè, juridicè, servato juris ordine &c.* in jure synonyma esse, nemo ignorat.

5. Post famam illam in Belgio vulgatam observatum est Lovanii, obmutuisse in scholis Theologicis Doctorem Steyaert, nec amplius suam illam Brevis Apostolici interpretationem jactasse: nullo dubitante, quin ipsi imprimis innotuisset, quod de Declaratione ista Congregationis Extraordinariæ fama ex Urbe vulgaverat.

6. Hæc facta tunc in Academia, ipsoque adeo Belgio fuere notissima.

7. Ut omninò intelligi non possit, quâ frontè à Doctore Steyaert mendacii arguantur Belgæ Theologi, qui dixerint, *illum jam pridem silere ex Urbe jussum esse, nec posse hoc factum Belgio notissimum negare.*

At ne quem moveant gravissimæ protestationes, quas ipse ait *ad ostensionem hujus luculenti* (ut pro sua modestia iterum repetit) *mendacii sufficere, eas nos non nisi ad ostendam protestantis temeritatem valere probabimus.*

protestationes Accusatoris non Theologorum Belgarum mendacium, sed protestantis temeritatem ostendunt.

I. **C**oram Deo, inquit, protestor, me neque ex Urbe, neque aliunde, umquam jussum esse filere super re aliqua hanc materiam repulsa attingente.

R. Aliud sine perjurio jurare non potest, quàm non meminisse se quod aut filere jussus sit, aut aliqua ipsi jussio insinuatâ fuerit.

At hoc, ut verum foret, minimè sufficit ad ostendendum mentitos esse Belgas Theologos, qui eum ex Urbe filere jussum esse affirmant. Si enim jusserit Congregatio Extraordinaria, ut Breve Apostolicum aliter, quàm volebat ipse, intelligeretur; profectò ex Urbe filere jussus est: etsi non tantum non meminerit eam jussionem sibi insinuatam fuisse, sed nec umquam ei insinuata fuisset. Uta-
mur exemplo ad hominem.

Sanctissimus Dominus Innocentius XII. edito 28. Januarii 1694. Decreto, *perpetuum silentium* super sensu Formularii & quinque propositionum imposuit. Nunc pone Decretum istud non innotuisse Doctori Steyaert: An ideo mentietur, qui Doctorem Steyaert super sensu quinque propositionum & Formularii filere ex Urbe jussum esse affirmarit? Aut ad eum de mendacio convincendum sufficiet, quod Doctor Steyaert coram Deo protestetur se neque ex Urbe, neque aliunde, umquam jussum esse filere super re aliqua sensum Formularii & quinque propositionum attingente?

Atque ut hoc exemplum prosequamur: Pone Doctorem Steyaert non innotuisse Decretum quo Sua Sanctitas die 7. Septembris 1695. condemnavit Thesim ipsius quam defendit Lovanii die 25. Junii ejusdem anni, idque ob *contraventionem silentii à Sanctissimo impositi*, ut in ipso Decreto exprimitur: An idcirco mentietur qui Doctorem Steyaert ex Urbe filere jussum esse affirmarit?

Pro-

Protestetur coram Deo, quantum voluerit, se neque ex Urbe neque aliunde umquam iustum esse silere super re ejusmodi; numquam tamen efficiet ut falsum sit (nedum mendacium) silere eum iustum fuisse.

Et quid si Summus Pontifex eum corrigi juberet, quod ne silentium quidem servaret, etiam postquam ex Urbe Decreto speciali silere iustus fuisset: diceretne, si Decretum istud sibi non innotuisset, mentiri Summum Pontificem? Aut crederet ad mendacii illius ostensionem sufficere, coram Deo protestari, se neque ex Urbe, neque aliunde silere iustum esse? Pergit interim protestari.

2. *Tantum abesse ut hoc factum sit Belgio notissimum, ut ne de eo umquam vel per rumorem aliquid audiverim.*

R. Insignis consequentia! Nihil umquam de facto illo vel per rumorem audi; ergo factum illud non est Belgio notissimum. Fateor tamen mirari me, quod coram Deo protestari id possit: cum certum sit litteras, ea de re ex Urbe scriptas, ad præcipuas quasque Belgii civitates, ut jam dixi, venisse; nec tacuisse id eos, qui litteras acceperant. Quid dicam? Mentitum esse, aut pejerasse? Absit. Quid ergo? Aliud non occurrit, quàm aut ipsi memoriâ excidisse quod à tribus jam circiter annis contigit; aut neminem ei ausum fuisse quidquam de eo significare. Quamquam rursus, si nihil ipsi significatum fuerit, non intelligam, cur post illud tempus ita de sua illa Brevis Apostolici interpretatione siluerit, qui toties illam antea in Scholis Theologicis jactabat. Audiamus porrò protestantem.

3. *Si de contrario, inquit, saltem probabiliter convinci potuero, tum velle me infamem & omni fide indignum haberi.*

R. Placet.

4. *Si verò non potuero; tum petere me, ut tamquam mendaces audacissimi & omni in posterum fide indigni habeantur Belga Theologi &c.*

R. Convinci eum posse quod ex Urbe silere iustus sit, patet ex dictis: An iussio ipsi innotuerit, ipse diligenter expendat.

B

Quod

Quod autem petit, ut si convinci non potuerit, tamquam mendaces audacissimi & omni in posterum fide indigni habeantur Belgæ Theologi, tunc tandem illi concedetur, cum ipse vicissim concesserit, se tamquam mendacem audacissimum & omni in posterum fide indignum habendum esse, si de Jansenismo aut Rigorismo convincere non possit Belgas Theologos, quos ut Jansenistas aut Rigoristas accusat. Nescio enim cur ipsi hic aliquid præ Belgis Theologis indulgendum sit. Quod si ipse non concesserit; profectò nec mendaces audacissimi & omni in posterum fide indigni habendi erunt Belgæ Theologi, etsi illum de eo quod asserunt, non convincerint. Convincere tamen posse, jam dixi: ubi contrà certum est, convinci ab eo de Jansenismo aut Rigorismo non posse quemquam è Belgis Theologis.

Quid plura? Scire debebat homo dialecticus minimè sequi: Belgæ Theologi affirmant Doctorem Steyaert filere jussu esse ex Urbe; igitur mendaces audacissimi sunt & omni in posterum fide indigni, si ipsum non potuerint de hoc facto convincere.

Nil hic dico de professione, quam subjungit circa Breve Apostolicum: dixit de ea sat multa *Confutatio Memorialis* Palazolii pag. 24. & seqq. Judicabit SS. D. N. Innocentius XII, an professio ista menti Apostolicæ conformis sit. Nos interim fide Theologorum Belgarum assertâ, fide omni indignum esse Accusatorem ostensam pergitur; non calumniandi animo, sed justæ defensionis necessitate: utpote qui famam tueri non possumus, nisi fide indignum ostenderimus eum qui tam iniquè illam proscindit. Porro fide indignus probari non potest; nisi (quod invitos facere nos cogit) aliquot fidei illius specimina proferamus.

Fidei Stejartianæ Specimina.

SPECIMEN I.

*Stejartii à Matre sua Academia & à genuinis Matris suæ
Filiis defectio & Apostasia.*

U Nanimus erant Theologi Lovavienſes, & omnes ſine discrimine Janſeniftæ, Rigoriſtæ, & Novatores ab æmulis exteriſ vocabantur Anno 1677. cum tres ex illis, VAN VIANE, LUPUS, & STEYAERT pro tuenda Matris ſuæ doctrina & fama, adverſus laxitates & Academicorum obſectatores in Urbem deputati, poſt annos circiter duos, Doctrinâ Lovaniënſium illæſâ, condemnationem Propositionum 65. ab Innocentio XI. Pont. Max. obtinuerunt.

Redux ab Urbe Doctör Steyaert, ſed ad ea, quæ ſperaverat, ab Academicis non promotus, anno 1682. palam in Oratione quadam Quodlibetica cum indignatione queſtus eſt, *Nulli bono ſuo fuiſſe Iter Romanum*, & pro mercede redeunti ſibi à Lovaniënſibus dictum fuiſſe: *I, ſervi Diis alienis.*

Ivit, & utinam Diis alienis ſervitum non iuiſſet! Nam ex hoc à Lovaniënſibus alienior, in *Theologia ſua emendata*, quam Ipris edidit anno 1685. ita de Lovaniënſibus loqui cœpit: *Quorum doctrinam ſi quandoque aſtimamus, non magis tamen præſtamus quàm Alcoranum.*

Verùm Ipræ anguſtiores erant & minus aptæ, quàm ut illic iſtud, *I ſervi Diis alienis*, ulciſceretur. Lovanium, vel invitis Academicis, redeundum erat. Hinc cum à Facultate ſtrictiore Theologica unâ cum Doctöribus *Huygens, Lacman, Paſmans & Hennebel* excluſus eſſet; viam ſibi ad illam nescio quâ viâ apud Potēſtates aperuit.

Apertâ viâ, & jam ad Acedemiam rediturus: *Je vaincrai*, inquit, *, où je croverai*; *Dominabor aut diſſympar*

Vix

Vix redierat , cum in convivio quodam , nescio quid in ipsum canentibus aliis , in hæc verba erupit : *Canant , canant ... dies venient , quibus dicent : utinam adhuc viveret D. Du Bois ... Leviasunt quæ ille fecit , addam ego duriora . Minimus digitus meus grossior est dorso ejus , ille vos cecidit flagellis , ego vos cadam scorpionibus .*

Horrenda præfagia ! sed minimè vana , ut subjuncta specimina docebunt .

S P E C I M E N I I .

Dogmata circiter quadraginta à Stejartio conscripta , & Academicis Lovaniensibus falsò afficta .

Scorpiones minatus erat parturiens Stejartius ; scorpiones uno partu edidit simul quadraginta , quos infelix Pater Doctori Huygens , ejusque adhaerentibus & Confæderatis impio ausu supponere tentavit hâc plenâ calumniæ Attestatione .

Infrascripti Sacra Theologia Facultatis Lovanii Doctores & Professores Regentes attestantur , se ex iis , quæ in hac Universitate observant , quotidie magis & magis percipere supra posita dogmata , quâ clam quâ palam serpere , & circumferri , tradi & inculcari apud Schola Theologica Lovaniensis alumnos , auctore Gummaro Huygens aliisque illi adhaerentibus & confederatis , non sine ingenti periculo infectionis non solum dicta Schola , sed etiam Belgii totius , per quod dicti alumni sparguntur . Datum Lovanii in vigilia S. Martini 1690 .

P. F. MARTINUS HARNEY.
MARTINUS STEYAERT.

Dogmata illa hic non exhibeo , cum in omnium manibus versentur , & jam dudum ostensum sit in *Responsione ad Articulos 42. in Refutatione Synopses , & Questionibus variis* , ea per summam calumniam Doctori Huygens aliisque affingi : Orbe interim & Urbe frustra expectante ut famam Virorum , quos gravissimè læsit , aliquando restituat Stejartius .

S P E -

S P E C I M E N III.

*Falsa Stejartii Accusatio adversus RR. Patres
Oratorii Montensis.*

INter *Adherentes & Confederatos* Doctoris Huygens non postremo loco Reverendos Patres Oratores recensebat Stejartius : utpotè qui fideles semper in Belgio Academiæ Lovanienfis Discipuli fuerint. Hos itaque aggredi oportebat. Opportunitatem obtulit Illustrissimus Archi-Episcopus Cameracensis, qui examinandam illi commisit causam RR. Patrum Oratorii Montensis, qui tamquam multorum in Doctrina & praxi excessuum rei accusabantur.

Auditis contra illos testibus omnibus, quos adversarii audiri voluerant, ipse Stejartius fateri coactus est nil contra eos allatum, unde *certò Rei haberi deberent*, ut scribit in *Epistola* ad Archi-Episcopum Cameracensem datâ die 10. Julii 1690. Proinde eos absolvere debebat. Sed mox, qui Judex fuerat, in eadem Epistola Accusatoris partes assumit, reos illos agens.

1. *Quod sequerentur doctrinam & praxim quorundam, qui hodie in Belgio & Galliis Jansenistarum vel Rigoristarum nomine vulgò audiunt.*

2. *Quod se à communi Religiosorum, præsertim Mendicantium, nec non aliorum, qui antehac rexerant, Sacerdotum spiritu, agendique ac regendi modo segregarent.*

3. *Quod pleraque omnia ad majorem austeritatem inflecterent.*

4. *Quod mortem Christi pro omnibus non satis ad omnes omnino extenderent.*

5. *Quod circa condemnationem 5. Propositionum non satis se explicare auderent.*

6. *Quod circa cultum B. Virginis saltem obloquitis darent materiam, fortè per modum loquendi non satis circumspectum.*

7. *Quod passim à Penitentibus exigerent, ut complicem peccati carnis, præsertim Ecclesiasticum, confessario revelarent, veniamque darent eum Superiori denuntiandi &c.*

Hasce Accusationes & similes Ill^{mus} Archi-Episcopus Cameracensis binis Decretis , altero 3. Oct. 1690. altero 12. Novembris 1692. editis, declaravit esse *scandalosas, diffamatorias, calumniosas, injurias* pietati & Religioni Sacerdotum Oratorii Montensis, & variis aliis probis virtuosisque Diocesis sue personis &c.

Post hæc saltem fidem amplius invenire non debuisset apud Ecclesiæ Antistites: invenit tamen, & atrociora etiam molitus est, ut subnexa specimina ostendent.

SPECIMEN IV.

Atroces calumniae viginti & una, à Doctore Steyaert palam per Epistolam Pastoralem Clero Diocesis Mechliniensis adscriptæ.

Nemo dubitat, quin Doctore Steyaert non parum conferente, Epistolam suam Pastoralem ediderit Illust^{issimus} ac Reverend^{issimus} Archi-Episcopus Mechliniensis, qui ipse in ea testatur, se; priusquam ederet, *omnis generis atque ordinis gravissimos Viros*, inter quos imprimis fuerit Doctor Steyaert, consuluisse. In ea continentur gravissimæ adversus Clericos Diocesis Mechliniensis Calumniæ.

1. *Quod indies minùs & minùs ab Hæreticorum placitis athor-
reant.*
2. *Quod de Romani Pontificis auctoritate contemptius & sen-
tiant & loquantur.*
3. *Quod Ecclesia sui temporis ipsis vilescat.*
4. *Quod disciplinam Ecclesiasticam privatâ auctoritate inver-
tant.*
5. *Quod iisdem armis utantur & iisdem pugnent artibus, qui-
bus Hæreticorum Majores, sed majori cum vastitate.*
6. *Quod Religiosas familias atrocibus calumniis incessant &
tantùm non obruant.*
7. *Quod Viros è Clero novitatum Osiores & antiquæ disciplina
retinentes, nihilo excipiant clementius.*
8. *Quod susque deque veriant omnia.*

9. *Quod pios fideles à frequenti cibi Eucharistici sumptione deterreant.*
10. *Quod pœnitentes à sacris Tribunalibus repellant tamquam indignos veniam, & destinatas orco victimas.*
11. *Quod aetatis nostræ Severista sint.*
12. *Quod Sanctissima Virginis Dei Matris cultum obliquè perstringant.*
13. *Quod Imagines viliori loco habeant.*
14. *Quod peregrinationes voti causâ susceptas tacitè rideant.*
15. *Quod cœtus aut sodalitia in Virginis honorem erecta proscindant.*
16. *Quod item proscindant cultum Sanctorum.*
17. *Adorationem Imaginum.*
18. *Et Reliquiarum.*
19. *Quod sacras Indulgentias flocci faciant; vel Christiani populi justè collocatam in eis fiduciam redarguant.*
20. *Quod non nemo usitata Catholicos inter in Mortuorum solatium Sacrificia obliquo dente arrodere non sit veritus.*
21. *Quod libros ex orco erutos, diaboli armamentaria, venenosos lacus, & putida stagna, flammis dignos, commendent, offerant, obtrudant.*

Hæc calumnias adoptatâ Epistolâ Pastorali suas fecit Doctor Steyaert, solemniq; Decreto XI. Kal. Nove mb. 1692. per Diœcesem Sylvæ Ducensem promulgavit, non sine enormi in totum Clerum Diœcesis Mechliniensis injuria. Neque tamen hic stetit: majora dedit suæ fidei specimina.

SPECIMEN V.

Calumniarum Monstra, à Stejartio in Jansenismo omnem Religionem destruyente; approbata.

Nihil umquam in genere calumniandi editum est monstruosius, quàm *Jansenismus* omnem Religionem destruens, à Sede Apostolica die 7. Decembris 1694. proscriptus: Hujus tamen causam egit aliquando Stejartius apud Facultatem Theologicam Lovaniensem, dicens illum ab

Archi-

Archi-Episcopo Mechliniensi adoptatum esse, in titulos digestum, & Romam missum. Cumque illi ab Arnaldo in scripto, *Procès de Calomnie*, objiceretur, quod se *Jansenismi* Approbatorem profiteretur, numquam id negavit; negaturus tamen, & *Mendacium* Arnaldo, ut Belgis Theologis, imparturus, si negare potuisset. Est autem *Jansenismus* iste plenus calumniarum monstris in DD. *Arnaldum*, *Van Vtane*, *Huygenium*, *Hennebellum*. En tibi ex illis pauca.

1. Quod si ab Atheis & libertinis conducti fuissent, non possent magis callide fidei nostra & Ecclesia exitium machinari.
2. Quod omnem pium affectum erga Deum, in Christum amorem, & studium bonorum operum extinguant.
3. Quod omnem in Ecclesia Judicem infallibilem eliminant.
4. Quod omnem destruant Hierarchiam Ecclesiasticam.
5. Quod venerationem Imaginum ac Sanctorum, etiam Dei-para cultum convellant.
6. Quod vilipendant Indulgentias & avertant à Sacramentis Pœnitentia & Eucharistia.
7. Quod odium & calumnias spirent adversus Religiosos.
8. Quod criminationes & contumelias adversus Episcopos & Vicarios Catholicos.
9. Quod Religionis interitum machinantes callido consilio auctoritatem Regum paulatim suffodiant, ut eversâ tandem omni potestate Ecclesiasticâ & seculari, sine metu suppliciorum, sine periculo, excussâ omni lege, Libertinorum atque Atheorum principia stabiliant, & pace securi fruantur.

Super his calumniis Doctorem Steyaert, tamquam earum Approbatorem, convénit Arnaldus, intentatâ ipsi dicâ calumniæ per Libellum cui Titulus, *Procès de calomnie*: Cui cum pro responso opponeretur *Jansenismus* alter, nec in eo negaretur, quin prioris *Jansenismi* Approbator esset Stejartius; reliquam *Calumnia* Dicam parte 2. 3. 4. & 5. Stejartio, tamquam qui jam silentio se *Jansenismi* Approbatorem fateretur, intentavit. Verùm ne sic quidem aut se illius Approbatorem negavit; aut ullum umquam, etsi ab Arnaldo gravissimè monitus, pœnitudinis signum dedit;

aut

t famam cujusquam per tot tamque graves calumnias
 refam reparavit. Quin & pergit lædere quotidie, ut doce-
 bit, quod sequitur.

S P E C I M E N V I.

*Stejartii calumnia quotidiana in Lovanienses Theologos,
 ipsi non devotos.*

EN tibi paucas ex innumeris.

1. *Quod cum Sacramento requirant amorem Dei effectu
 super omnia & viam sternant ad sententiam qua cum Sacramento
 requirit amorem justificantem. In Thesi 26. Julii 1695.*

2. *Quod requirant, ut peccata mortalia confitentes, operapæ-
 nalia . . . distincta ab iis, qua Tridentinam requirit, pramittant,
 alias ad tempus, quousque illa posuerint, dimittendi. In Thesi
 28. Junii ejusdem anni.*

3. *Quod in praxim istam paradoxam incidant, sine modo dif-
 ferendi absolutionem hominibus alioquin non malis. In Thesi 17.
 Maii 1696.*

4. *Item cogendi omnes primâ vice ad confessionem generalem,
 nisi apud suos symnystas confessi fuerint. ibidem.*

5. *Quod ita præticent saltem apud homines non magnæ autori-
 tatis. 26. Julii 1695.*

6. *Quod ut exiitimationem sibi suisque conservent, tempori-
 us, ut vocant, nubilosos, potentes absolvant ea cum dispositione,
 uâcum non idem pauperibus facerent. 29. Martii 1696.*

7. *Quod pro ratione facilius absolvendi habeant, ne ipsi vel
 ars eorum odiosi fiant. ibid.*

8. *Quod ideo dissimulens etiam in jure natura ea qua aliter
 lædarent acerrimè. ibid.*

9. *Quod contendant passim malè administrari Pœnitentia Sa-
 cramentum, prout hodierna præscribit consuetudo, simul & Ritua-
 lia. 17. Maii 1696.*

10. *Quod summam opinionem habeant de vetere Ecclesia tan-
 tum, non de moderna. 22. Julii 1696.*

11. *Quod somnient Borromeos ac Salesios in suis libris & Sy-
 nodis dictasse, non qua judicarent maxime salubria, sed quorum
 corruptos sæculi mores avidos esse crederent. 17. Maii 1696.*

12. *Quod constantem iustitia Christiana stabilitatem nescio quam, & tantum non inamissibilitatem petant & fingant.* ibidem

His & huiusmodi calumniis plenæ esse solent Theses quibus præsidet: Lektionen item ipsius quotidianæ, ad quas cum sæpe imparatus veniat, cogitur non rarò inopiam suam ex illo suo, quem semper paratum habet, calumniarum, invectionarum & diæteriorum thesauro supplere. Unde vulgatum inter Theologos: "Quadrantem unum, cum docet, illum impendere lectioni S. Thomæ, Wiggers, Sylvii, aut suorum Aphorismorum; Quadrantem alterum, explicationi; tertium, diæteriis, scommatibus, invectionibus, aut calumniis in prætenso Jansenistas, Rigo-ristas, Novatores, vel Baianos."

SPECIMEN VII.

Theologi potationi; fumationi tabaci, & chartarum lusui addicti, passim à Stejartio per falsa testimonia ad Sacros Ordines & curam animarum promoti.

IN Decembri Anni 1694 Stejartius in jus vocaverat Opstratium, accusans eum inter cætera quod dixisset, Theologos addictos potationi, fumationi tabaci, & lusui chartarum piotiarum, facile ab ipso accipere testimonium & promoveri ad SS. Ordines & curam animarum.

Honori ipsius consulens Opstratius rogabat, ne ad probationem venire cogeretur: habere quidem se in promptu testimonia plurima, quibus id probaret; sed paratum igni tradere omnia, si à lite desisteret Stejartius. Noluit: Testes ut produceret Opstratius, cõegit. Produxit hic testes plures, quàm opus erat; qui juridicè interrogati: *An passim illi, quò excessus istas potitionum, vel fumationum, vel lusuum Chartarum committebant, non acciperent à Dño Stejartio testimonium ad SS. Ordines & promoverentur ad curam Animarum?* Uno ore responderunt, affirmativè.

Interrogati item juridicè: *An scirent, quod ulli illorum umquam propter excessus istos testimonium negasset?* Se non scire responderunt. Itaque

Itaque quot tales promovit (promovit autem plurimos) tot falsa testimonia dedit; neque enim promovetur, qui testimonium de morum suorum probitate non affert.

S P E C I M E N V I I I.

Stejartii in Theologos præ cæteris modestos, & Officio suo ac pietati addictos persecutio juridicè probata.

IN eadem causa Testes juridicè interrogati sunt: *An non scirent, quod testimonium negasset pluribus aliis, qui ab illis (potitatione fumatione, & lusu chartarum) abstinebant?*

Item: An eos, qui præ cæteris modesti erant & officio suo ac pietati addicti, non specialiter persequeretur?

Iterum ad utrumque responderunt plures, quàm ad sufficientiam Juris opus erat, *Affirmativè.*

Quæ omnia constant ex Actis juridicis & Authenticis, ex quibus die 22 Augusti 1695. contra Stejartium pro Opprobrio sententiam pronuntiavit Rector Magnificus Academia Lovaniensis: adeo ut jam probatum sit juridicè, Bonorum Persecutorem esse Stejartium.

S P E C I M E N I X.

Acta Persecutionis Stejartianæ in Viros quosque bonos Exemplares.

APerte (quidquid dissimulet) Bonis omnibus persecutionem & bellum indixit Stejartius, cum de quadraginta duobus Articulis Doctorem Huygens ejusque *Adherentes & Confederatos* accusavit. Equidem per *Adherentes & Confederatos Doctoris Huygens* non alios in Belgio designari, quàm Theologos præ cæteris probitate vitæ ac morum, pietate & zelo conspicuos, omnes fatentur: Qui autem doctrinæ aut vitæ dissolutioris sunt, hi passim *Adherentes & Confederati Doctoris Steyaert* vocantur.

Porrò inter *Adherentes & confederatos*, ut vocat, Doctoris Huygens, neminem acerbius persequitur, quàm Opprobrium, cum quod is præcipuè calumnias ipsius detegat ac retundat; tum quod doctrinæ ipsius novæ & laxiori se intrepide opponat.

In hunc itaque atrocissima quaque & invidiosissima confinxit, tum in Urbe per Deputatum nuper suum Desirantium, tum in Belgio per seipsum. In Urbe, istud atrox finxit sive ipse sive Deputatus ipsius: "Doceri ab Opstratio, *Episcopum, dum promouet Clericos, consulere debere horum Confessarios*, qui nimirum usi scientiâ ex Confessione hausta, optimè possint Episcopum de ipsorum vita, moribus, & spiritu interiore instruere." Et ne quis suspicaretur calumniam, locum designabat in Praefatione Pastoris boni. Sed hâc inspectâ, locum corrupisse deprehensus est, & de calumnia convictus. A calumnia tamen non destitit; sed multò etiam atrociora dictuque horrenda, ut illum nuper à Gradu Doctorali impediret, effinxit. Verùm & hâc confutata sunt coram Facultate Theologica Lovaniensi; quæ, audito super singulis Opstratio, & sibi factum esse satis declaravit, & ad Disputationes pro Magisterio illum admisit. Unum nunc exspectatur, ut viâ juris, quam claudi fecit Stejartius, apertâ, detur aliquando Opstratio suum coram Judice legitimo calumniatorem convenire, atque ad probandas vel recantandas calumnias illum compellere.

Quid non machinatus est in Doctores Claes & Verschuren, ut eos similiter à Gradu Doctorali impediret?

Quid non in alterum Verschuren piæ memoriæ Decanum Gelensem, Virum Doctrinâ, pietate, & moribus eximium, ut eum à Decanatu repelleret?

Quàm iniquè vexavit & vexat etiamnum plures Diocesis Sylvæ Ducensis Clericos, doctrinâ & moribus præstantes; qui aut ad alienam Diocësim transire coguntur, aut non nisi post multas difficultates ad SS. Ordines vel ad Curam Animarum ab ipso admittuntur?

Quàm dirè exagitat optimos quosque in Academia Lovaniensi Theologos, quos à Disputationibus & Gradibus Academicis omni viâ excludere conatur?

Tandem quis in Academia bonus est, aut ipse non planè servus, qui ipsius Tyrannidem non sentiat? Uno id exemplo demonstrare liceat.

Vir omnium iudicio non modò doctus est, sed & bonus, rectus, ac timens Deum Doctor Renardi; minimè servus Stejartio. Hinc ipsum à Facultate strictiore Theologica jam dudum excludere molitus fuit, præferendo illi Doctorem Marcelis. Sed re in Urbem delatâ, pro Doctore Renardi pronuntiavit Sedes Apostolica. Sententiam non reveritus Stejartius, recusavit cum illo Congregationi Facultatis, aut ulli Actui interesse, quo videri posset illum tamquam Facultatis membrum agnoscere, inimicitias publicas cum totius Academiæ scandalo exercens. Quin dixit illi aliquando: *Non habebis partem mecum in æternum.* Et fortè in hunc usque diem partem cum illo habere nollit, nisi videns absentiam suam nulli obesse quàm sibi, aliis prodesse plurimum, consilium mutasset. An mutaverit animum, quæ sequuntur docebunt.

Die 26. Maii 1699. per mortem Doctoris Sullivanæ vacavit in Academia Lovaniensi Lectio Catechistica cum annexo Canonatu S. Petri. Ad hanc Electorali Suae Celsitudini obtulit se Doctor Renardi, publico omnium testimonio sine controversia dignissimus. Obtulère & se Licentiati quidam Doctori Steyaert addicti. Libellos se offerentium ad iudicium Facultatis strictioris Theologiæ pro more remisit Sua Celsitudo. Erant paulò antè in Facultatem intrusi Doctores Desirant & Damen Stejartio devotissimi: Cum his, iuncto etiam Harnæo, censuit Doctorem Renardi Licentiatis istis non postponendum solum, sed etiam tamquam indignum excludendum. Stupuit Academia & Belgium ad iudicium tam iniquum: ideoque & Serenissimus Elector, eo spreto, Lectionem Catechisticam Doctori Renardi contulit. Res innotuit Doctori Steyaert, qui confectis mox in Doctorem Renardi plusquam centum, ut fertur, accusationibus, per Doctorem Martin supplicavit Suae Celsitudini, ut vel non expedirentur collationis Litteræ, vel si expedire forent, interdiceretur Capitulo S. Petri Doctorem Renardi in possessionem mittere. Territa tot accusationibus Sua Cel-

situdo, cùm jam Litteræ expeditæ forent, Capitulo interdixit. Quin & Lectionem in alterum propediem colatum iri, Stejartiani gloriantur.

Atque hæc dum agit, palam etiam iis, quos persequitur, insultat. Nam ipso die, quo interdictum insinuatum fuerat, ita in lectione sua publica gloriatus est: "Conquerantur olim Donatistæ de Augustino aliisque Episcopis Catholicis, quod ab Imperatoribus impetrarent interdictionem, quibus ab officiis & dignitatibus excluderentur; quemadmodum & hodie conqueruntur aliqui de nobis: sed non quærimus quæ ipsorum sunt; quærimus ipsos. Ego ad exiguitatem meam redire paratus sum, & omnia dimittere, modò ad unitatem redeant. Habeo ad bene ornandum & onerandum tres vel quatuor ex illis."

Ita homo schismaticus, qui Matris suæ Academiæ viscera dilaniat, comparat se Augustino; eos verò, à quibus se divisit, Donatistis, quos etiam audet ad unitatem secum, hoc est ad schisma invitare. Porro quàm paratus sit ad exiguitatem suam redire, ostendent specimina sequentia. Hoc verè dixit, habere se, undè benè ornentur & onerentur tres vel quatuor à Belgis Theologis. Infelix! qui se ornatum putat, oneratum non sentit, gaudens honore, non ingemiscens sub onere!

SPECIMEN X.

Stejartius super excessibus suis à Rectore Magnifico monitus, & monita superbè contemnens, dein ab Officio Fiscali impetitus, & sua manu cautionem de cavendis excessibus scribens, fidem paulò post frangit.

CUM anno 1695. Kal. Martii in Lectione publica varios excessus commisisset, monuit eum super his Rector Academicus, missoque Bedello rogabat, & in quantum opus mandabat... ut deinceps modestius ageret signanter in suis Lectionibus publicis. Respondit, numquam se processisse minùs modestè quàm debeat, & intendere procedere eodem modo. Cùmque

que privatis monitis non obtemperaret, aggressus est eum Academiae Fiscalis, qui oblato libello exhibebat, Jam ab annis aliquot Academiam turbatam fuisse à Doctore Steyaert; excessus enormes ab ipso quotidie in Lectione publica committi; novos illum excessus adhuc minari, rebellem esse adversus mandata Rectoris &c. ideoque supplicare se ut publicè ei docere interdiceretur. Interdictum est, donec sufficienter cavisset de obediendo anteriori Rectoris mandato. Hoc interdicto velut fulmine ictus Doctor, paulò antè tam intrepidus, ad Rectorem supplex venit quid factum ab ipso velit, rogat. Juberet Rector ut spondeat nullos deinceps in Lectione publica excessus committere. Nec mora, suâ manu scribit hanc cautionem:

INFRA-SCRIPTUS RECIPIO NULLOS COMMITTERE EXCESSUS IN LECTIONE MEA PUBLICA. *Lovanii 18. Martii 1695. M. STEYAERT.*

Sed fidem ipsi Rectori Academico tam solemniter datam non multò post fregit die 19. & 27. Aprilis, item die 6. & 13. Maii ejusdem anni, cum iterum insolentissimè in quosdam Academicos in Lectione sua publica debacchatus est.

SPECIMEN XI.

Steyartius iteratò ob excessus à docendo suspensus, vi & malleis, contra mandatum Rectoris Academici, Scholarum portas effringit & Cathedram conscendit.

Super novis istis excessibus iterum ipsum invalit Officium Fiscale, & iteratum hoc adversus eum Decretum obtinuit.

Communicetur Parti (Doctori Steyaert) ut ad consentia hujus deliberet intra triduum ab insinuatione, suspendentes interim iteratò eandem Partem ab omni exercitio Lectionum publicarum, donec à Nobis aliter fuerit ordinatum. Datum hac 16. Maii 1695. Infra habebatur, De mandato Magnifici Dñi Rectoris. Signatum erat J. V. Goedenhuyse.

Cùm interdictum hoc, non jam precibus, aut datâ cautione, sed processu illegitimo elusisset; viâ facti se in Cathedralam restituit. Nam ducto secum Fabro ferrario, portas publicas, quas claudi jusserat Rector Academicus, inspectante Academiâ totâ, & Satellitio Academico obfistente, malleis effregit, aditumque sibi in Scholas Theologicas aperuit.

S P E C I M E N XII.

Stejartius, dum seipsum Rectorem facit, & viâ facti, adjuvante Fabro, in Throno Rectorali se collocat, à Rege interdicatur.

Simili viâ & vi usus est die 31. Augusti 1695. Cùm enim in Rectorem Academicum electus esset Doctor Huygens, & tamquam Rector Epomide, quod Rectoris insigne est, à Rectore defungente pro more investitus, atque ad Templum S. Petri comitante Academiâ deductus: Doctor Steyaert se etiam electum esse contendens, aliunde sibi afferri jussit Epomidem, quâ & ipse se induit, eademque indutus post meridiem ad S. Petri venit, comitante iterum fabro ferrario, per quem jussit sibi aperiri Thronum Rectoralem, atque in eo se viâ facti collocavit; ridente totâ Academiâ, donec ipsi post dies aliquot, ne se diutius pro Rectore gereret, à Rege interdictum est.

Ab Academia Romam transeamus cum Stejartio, & quantâ humanitate Aulam illam salutet videamus.

S P E C I M E N XIII.

*Calumnia Stejartii in Eminentissimum S. R. Ecclesia
Cardinalem AGUIRRIUM.*

Eminentissimum ac doctissimum Cardinalem Aguirrium calumniatur in *Specimine Dispositionis* pag. 6. impudenter affirmans eum Authorem, non esse eorum, *quæ in libris suis habet circa controversias modernas de Penitentia*, sed ab aliis ea inseri passum esse.

Quâ calumniâ non uno modo in tantum Virum peccat.

1. Detrahit illi laudem insignem, quam ex doctissimis suis de Pœnitentia *Dissertationibus* meritò apud omnes acquisiverat.

2. Adscribit illi vanæ gloriæ ambitionem, quasi ex alieno labore laudem venatus sit.

3. Redarguit illum de fide mala; quippe qui Orbi imposuerit, & Scripta aliena sub suo nomine hominibus venditârît.

SPECIMEN XIV.

Labes à Stejartio aspersa pientissimis manibus ac gratissimæ memoriæ Cardinalis BONA.

" **A** Nno 1697. die 11. Maii cùm Præside M. Steyaert publicè in Hallis Lovanii defenderentur Theses Sabbati-
 " næ de Virtutibus & Peccatis in genere: contra partem ex
 " conclusione secunda dictarum Thesium assignatam, quæ sic
 " se habet: *Quid verò de hac diffinitiuuncula ex eodem Augusti-*
 " *no, quâ virtus dicitur esse ordo amoris? Resp. Bona est suo*
 " *sensu, sed valde impropria, minùsque Theologiæ communi*
 " *accommodata; nec proinde adamata iis, qui magis obvia*
 " *sectantur*: positum est tale argumentum ab Oppugnante:
 " *Vestra Thesis graviter censuratur à Cardinali Bona; ergo*
 " *non est admittenda.* Cùmque Defendens peteret verba Cardi-
 " nalis, prælecta sunt ab Oppugnante ex Epistola præfati Car-
 " dinalis scripta ad Eximium D. Van Viane in Vigilia Penteco-
 " stes 1673. & præfixa Operi ejusdem Doctoris, quod intitula-
 " tur: *Tract. triplex De Ordine Amoris* &c. atque ita sonant:
 " *Dissertatio De Ordine Amoris,* (Oppugnans dicebat, *hæc*
 " *virtutis definitio, Ordo amoris:* hæc enim per totam Dis-
 " sertationem ubique adstruitur) *illis solis displicere poterit,*
 " *qui seipso amantes, & secundum hominem viventes in seipsis*
 " *& non in Domino gloriantur.* Ad quod argumentum cùm De-
 " fendens pauca vel nulla diceret, ipse Præses Steyaert respon-
 " dit, ut sequitur: *Quantum ad ipsum Cardinalem hæc me-*
 " *ritò animadvertuntur; quòd cùm præfatus Cardinalis Bona*
 " *mississet*

" misisset ad quemdam Carmelitam Discalceatum , fratrem
 " Archiepiscopi Cameracensis defuncti , quandam Epistolam ,
 " in qua partem sibi adversam graviter censurabat , Epistolæ
 " hæc per imprudentiam dicti Carmelitæ hic fuerit publicata ,
 " & sic devenerit in notitiam Pontificis Clementis , qui accersi-
 " tum præfatum Cardinalem interrogavit : Bene , Domine
 " Cardinalis , quot sunt hic Pontifices ? Et respondenti cum
 " summa submissione (quam D. Steyaert gestibus suis signifi-
 " bat) Sanctissime Pater , tantum unicum agnosco , reposuit :
 " Cur ergo tu tibi jura Pontificia arrogas aliis tam graviter
 " censurando , quod soli Pontifici competit ? Quæ correptio
 " præfatum Cardinalem ita percelluit , ut parum postea inci-
 " derit in morbum ex quo etiam mortuus est , forsitan adhuc ali-
 " quamdiu postea victurus , si talis res ipsi non obvenisset . Cum-
 " que Oppugnans instaret , Ergo Cardinalis hic equidem est
 " unus ex illis Novatoribus , contra quos jam agitis : cum sitam
 " acriter censuret vestram Thesim , steterit indubiè fortiter
 " pro sententia opposita (vocaverat jam parum antè D. Steyaert
 " Novatores illos , quibus hæc virtutis definitio ; *Ordo amoris* ,
 " multum placet) reposuit D. Steyaert , pro ulteriori satisfactio-
 " ne quoad istum Cardinalem videri posse Thesim proximo Sab-
 " bato defendendam , quæ jam statim distribuenda erat , & con-
 " tinet hoc Corollarium : *Exemplo est Author de quo agitur ,*
 " *non semper è libris Cardinalium , Romæ cum Approbatione*
 " *solemni impressis , securè poti doctrinam Ecclesiæ Romanæ.*
 " Hæc omnia quæ hic narrantur , nos (saltem in substantia) pro-
 " priis auribus audivisse & prædictis Disputationibus Sabbatinis
 " intersuisse infrascripti testamur

" N. N. S. T. B. F.

" N. N. S. T. B. F."

SPECIMEN XV.

*Suspiciones nigerrimæ à Stejartio affrictæ integerrimæ
Purpuræ Cardinalis CASANATE.*

Epistola Martini Steyaert ad Ill.^{um} Sedis Apostolicæ
Bruxellis Internuntium.

Illus.^{me} ac R.^{ms} Domine.

*Infelix ego, cui semper nuntianda sunt infausta, nunc etiam
atrocia. De Belgio agitur in puritate Religionis conservando,
deque famatuenda Viri summi, & quidemejus, qui utriusque
nostrum, Illustrissime Domine & Patrone, singularem se jam
pridem patronum exhibuit. Aliquot anni sunt, ex quo in pu-
blica Congregatione Facultatis nostræ Theologicæ, ut vocant
latæ, P. Magr. Le Droununc R.^{mus} Episcopus Prophyriensis,
nomine Eminentissimi Domini Cardinalis Casanate inquisivit,
num quis haberet aliquid Operum vel Opusculorum Michaëlis
Bay, desiderare illum omnia: Idem apud plures seorsim repe-
tiit, & serid quæcumque reperire potuit conquirit, nemine
tunc facile conjiciente, quid vellet hæc Eminentia tam curiosâ
conquisitione Operum damnatorum, & quæ Ecclesia Romana
semper cupiisset suppressa, nisi fortè ut omnia novâ damnatione
veligne sub auspiciis suis abolerentur. Cùm ecce heri in manus
meas incidit; postquam obscurius tantisper rumor præcesserat,
volumen typis editum, quo Opera ista infelicia, tam edita ha-
ctenus quàm inedita Orbi prostituuntur, unâ cum præfationi-
bus, notis & glossis passim pestilentissimis; verbo vocare liceat
Baianismum protervè redivivum.*

*Mitto Codicem quem solum, & fortè è bene affectis Ecclesiæ
Romane solus habeo: nondum passim prostat vel in manibus
est, quod ubi proximè fiet, perspicuum est quid sequi amet;
præter immanem utique curiositatem & corruptionem pluri-
morum, SUSPICIO INSUPER ATROCISSIMA, QUOD OPUS NE-
QUAM NON ALITER, QUAM JUSSU, HORTATU, VEL SALTEM
PERMISSU VIRI ISTIUS EMINENTISSIMI LUCEM VIDEAT: AU-*

DIT HIC INIQUISSIMÆ PARTIS ISTIUS FAUTOR IN URBE PRÆCIPUUS; IPSI IMPUTATUR, UTI CONGREGATIONI S OFFICII CORYPHÆO, QUOD JAM A QUADRIENNIO VEL QUINQUENNIO NULLUS TAM INFANDUS LIBER AUT ETIAM DOCTRINA EDI POTUERIT A NOVATORIBUS, CUJUS VEL LEVISSIMA CENSURA NOVA ROMÆ VALUERIT IMPETRARI, UNDE ISTIS TANTA QUIDLIBET IMPRIMENDI AUDACIA. *Ipsū intelligunt omnes designari, dum in Libello Gallico, Difficultez proposées à M. Steyaert, jactare audent Decretum Alexandri Papæ VIII. contra 31. Propositiones Romæ tantū non derideri à Cardinalibus N.N. Omitto cætera, nec fortasse minora, quibus ubi accesserit novi hujus libri flagrantissima invidia, quid fiet Illustrissime Domine?*

*Si librum Romam misero, impensam fecero, solumque au-
xero cumulum tot aliorum illic frustra missorum, ridentibus
adversariis oleum nostrum & operam in talibus perdi solitam.
Mitto igitur eum ad Ill.^{mam} ac R.^{mam} Dominationem vestram,
quæ fortè Bruxellis inveniet promptissima remedia. Has ego
interim litteras non communico; nisi cum amicorum fidiſſimis:
mecum omnes expectabunt, quid opis tandem feretur pro Ec-
clesia, & ipsa Roma candore Belgico laborantibus: ad me
quod attinet, videre pergo quorsum me nuper hostes Romam
depoposcerint; ubi tam parum negotii mihi erat, ut ipse Pater
Desirant, re post solidum quadriennium infectâ, etiam re-
dire cogatur. Nempe Lovanio submovendus eram, ne novæ
huic nequitie, aliisque forsitan secuturis utcumque invigila-
rem. Dum scribo renuntiatur mihi, publicè jam hic Librum
proflare apud Bibliopolam Stryckwant. Deus misereatur no-
stri & benedicat nobis: beatus qui non fuerit scandalizatus in
istis.*

*Maneo non minore cum veneratione quàm fidu-
cia, commendans rursus ex animo negotium ince-
ptum Vicariatus Sylvæducensis. Lovanii 11. No-
vembriſ 1696.*

M. STEYAERT.

Decla-

Declaratio Authoris super præmissa Epistola.

Hanc copiam, quam nescio unde quis nactus sit, cum nulli litteras describendas dederim, fateor ita ut hic à me correctæ & suppleta est manu propria, correspondere anthographo, quod apud me servo. Istis autem litteris humanissime respondit Illustrissimus D. Internuntius, ut suggererem remedia Bruxellensia, de quibus in genere scripseram, quod ut facerem, scripsi, ad Concilia Regia recurri posse, quibus à Sua Majestate injunctum foret, ut ad querelas Prælatorum coacerent libros ejusmodi pravorum. Cum verò postea nihil secutum est in re ista, ita à Superioribus meis testimonium veritatis rogatus testor. Lovanii Kalend. Februarii 1697.

M. STEYAERT.

Testimonium Notariorum Apostolicorum super præmissa declaratione.

Ego infra-scriptus testor sup.^{am} Declarationem esse scriptam manu Amplissimi D. Steyaert Vicarii Apostolici Sylvad. cujus characterem probè novi. Ita testor

Jac. Otiaert Not. Apostolicus.

Idem testor

H. J. Van Susteren Protonot. A. plicis.

SPECIMEN XVI.

Steyartius in suspicionem adducit Aulam Romanam, quod pecuniis se corrumpi passa sit ab Hennchello & prætenfis Jansenistis.

Notissimus Urbi & Orbi est R. P. Joannes Baptista FRANCHOIS Jesuita per *Theses* suas *Theologicas De Deo & Religione cum Digressionibus*, in quibus insinuabat septuaginta quinque florenorum millia à prætenfis Jansenistis

nistis è Belgio Romam missa fuisse ad Hennebellum, quibus Aulam Romanam corrumpere.

Romam citatus fuit Jesuita; qui diu tergiversatus, post longas tandem itinerum ambages & moras in Urbem apulit. Interrogatus, quò fundamento assereret *constare*, tot aureorum millia Romam missa fuisse? Respondit id constare non à parte rei, sed per famam publicam: Hanc se probare testimoniis D. D. Steyaert, Du Bois, Martin, Marcellis, Damén, Bouchy, Clénaerts. Lepida sunt singulorum testimonia; sed ea commemorare non libet. Declarant omnes passim fuisse rumorem de missis Hennebello 75. millibus. Addit Stejartius non tantum de septuaginta, sed postea etiam de centenis actum fuisse, præter stanna Anglica, lintheamina &c. D. Martin testabatur; Dominum N. habitantem in Collegio Viglii, dedisse tria florenorum millia, & filias quasdam devotas, licet tenuis fortunæ, dedisse florenos octingentos &c.

Non memini inter testes Romæ productos fuisse Doctorem Harney: sed is partibus suis non defuit in Belgio. Est penes nos instrumentum authenticum, quo Vir quidam Religiosus declarat, quòd à R. P. Harney S. T. D. audiverit, *transmissa Romam fuisse septuaginta millia florenorum in pecuniis ad usum Dñi Hennebel, non computando quantitatem stanni Anglici, nec non bonam quantitatem pretiosorum lintheaminum in dona. Item declarat eundem dixisse, quòd cum quidam Cardinalis alium invisisset & admiraretur pretiosas coloratas vestes in pedissequis alterius, dixerit alter illas donatas esse à Doctore Lovaniensi; indicans hoc nomine Doctorem Hennebel.*

Dicit Stejartius, se tantum testari de rumore; non de rei veritate. Sed vel credere rumorem illum verosimilem esse, ut credit is qui de eo testatur, atrox est in Aulam Romanam injuria. Vicarii certè Apostolici erat, rumorem istum tam iniquum compescere; aut saltem non efficere suo testimonio, ut apud homines, Sedi Apostolicæ minùs affectos, ac præcipuè Hæreticos, fidem inveniret. Quid enim hi existimabunt aliud, quàm persuadere velle ipsum

ipsum Vicarium Apostolicum, haberi omnia Romæ cum pretio ? Præsertim ubi idem non multò post in *Specimine Dispositionis* pag. 9. asserit, *Romam istis favisse ad invidiam: Omnia ipsis contraria passim proscripsisse; nihil penè quod ipsorum esset aut putaretur: Quos ipsi voluerant, ad Urbem gravissimo imperio evocatos esse: Brevia quadam & Decreta obtinuisse: pretio utique septuaginta quinque millium florenorum, stanni Anglici, pretiosorum linteaminum &c.*

Ita ad enervanda Brevia & Decreta Apostolica, quæ non favebant Stejartio, ipsam Sedis Apostolicæ Authoritatem enervat.

S P E C I M E N XVII.

Stejartii in Sedem Apostolicam frequens inobedientia ac rebellio.

PRima fuit adversus Breve Apostolicum SS. D.N. Innocentii XII. editum 6. Februarii 1694. in quo rejiciuntur *Additiones* Mechliniensis Archi-Episcopi. Mox enim Programma edidit, quo tamquam Vicarius Apostolicus sensum Brevis ad sensum *Additionum* detorquet, & juxta has juramentum in Formularium Alexandri VII. præscribit. Verùm non multò post jussus est à Sede Apostolica Programma suum suppressere.

At non diu se continuit. Die 25. Junii 1695. Thesi publicâ violavit Dècretum ejusdem Sanctissimi editum 28. Januarii 1694. palam! gloriatus, *Episcopos Belgii admittere non debere in juramento Formularii Alexandri VII. has voculas: AD MENTEN MODERNI PONTIFICIS, vel etiam BREVIS APOSTOLICI, non obscure significans, jurandum esse ad sensum sui Programmatism & Additionum.* Quam Thesim rursus solemnî Decreto condemnavit Sua Sanctitas 7. Septembris 1695. *Ob CONTRAVENTIONEM silentii à Sanctissimo impositi.*

Verùm neque sic siluit. Die 19. Julii 1696. subscriptis litteris ad S. Sanctitatem, quibus querebantur Episcopi

Belgii, per Breve Apostolicum datum 6. Februarii 1694. satis consultum non esse malis Jansenismi: cùmque iis per Breve illud satis consultum fuisse respondisset Sua Sanctitas Brevi altero dato 24. Novembris ejusdem anni: Non acquievit; sed cum iisdem Belgii Episcopis die 22. Aprilis 1697. edidit *Decretum circa usum Formularii*, quo iterum manifestè Programmatissimè sui & *Additionum* sensum contra sensum Brevis Apostolici restaurat, & silentium à Sanctissimo Domino impositum de novo infringit.

Addidit & alia inobedientiæ & rebellionis suæ specimina.

Die 2. Martii 1695. folium, quod *Repetitionem* vocat, ediderat, ubi inter cætera promulgabat, *Quòd revocato jam Deputato Episcoporum Belgii, qui Romæ urgebat controversiarum decisionem, non amplius expectaretur talis decisio &c.* Ignorare non poterat, vehementer hæc Romæ displicuisse, & tamen Kal. Novembris 1696. similia iterum ausus est in *Prefatione*, ut vocat, *Approbatoria*, quam Tractatui *De Operibus pœnalibus* præfixit: *Jam vix*, inquit, *ullus audeat tam propinquam sperare hanc decisionem, crediturque fieri posse, ut quadriennio, quod jam in discussione Romana exactum est, anni fortè plusculi adhuc accedant priusquam Sedes Apostolica huic negotio finem imponat.* Insigniter super hac temeritate corripitur iussus est die 1. Decembris sequentis, & ne rebus Romanis deinceps se miscere auderet, moneri. An correctionem is, cui ea mandata erat, executus fuerit, ipse novit: Fortè illi hanc in memoriam revocare poterit Doctor Harney. Nos rumore non dubio didicimus, quòd acerbè ea Virum delicatum pupugerit, atque ita affligerit, ut quamlibet satisfactionem, imò & recantationem, si opus videretur, offerret.

Sed vix pœnitentiam egerat, cùm relapsus est, & libello, *Doctrina & Praxis S. Caroli Borromæi CENSURAM Prefatione Approbatoriâ* multò deteriore præmisit. Vix ea Romæ cum indignatione Urbis visa fuerat, cùm die 10. Februarii 1697. adjecit PROVOCATIONEM MANIFESTAM;

Opus facillè princeps inter *Opera Justa Molis* quæ potuit umquam Auctoris ira evomere. Nihil minùs expectabat is, cui non multò antè tam bella ac speciosa promissa fecerat; corripì eum & de scandalo tollendo moneri jubet; opem implorat Rectoris Academici, qui mox promunere suo infame Opus suppressit: tandem suscepit amicus Doctori Steyaert addictissimus, seriò illi denuntiare, ut aliam agendi rationem iniret, nisi in se vellet Sedis Apostolicæ & bonorum omnium indignationem commovere.

Intereà aliud *Justa Molis Opus* ejusdem Auctoris Urbi innotuit, *Epistola ad Ministrum Apostolicum* suprà relata, ubi temeritate plusquam Stejartianâ Virum quemdam Eminentissimum de curata *Operum Baii* nova Editione accusat. Tum demum gravius aliquid in ipsum decretum fuisset, nisi pœnam deprecari fuissent illi ipsi, qui eam poscere debuerant.

Eodem anno 15. Junii moneri ex Urbe jussus est super Thesi quam defenderat 18. Maii, ubi videbatur Eminen- tissimis insultare. Spondit se id facturum is, cui id negotii committebatur; sed frustra se facturum existima- bat. Hominem illum equidem, quoties moneretur, mira spondere; sed nihil minus præstare postea: aliis proinde cum eo remediis opus esse.

Rursus 10. Aug. ejusdem anni denuntiari ei ex Urbe jus- sum est: summoperè displicuisse ipsius *Epistolam ad Doctorem Huygens* editam XII. Kal. Julii; falsa plura in ea conti- neri; ferri ægettimè, quòd sæpius talia tam leviter ef- furiat; priùs jam illum de his communitum fuisse, sed sine fructu; alia deinceps adversùs eum remedia, ut sa- pere discat, cogitari &c.

Quid post hæc omnia? Sapuit? Numquam desipuit magis. Nam post tot Sedis Apostolicæ correptiones, post emendationem toties promissam, homo tot benefi- ciis à Sede Apostolica cumulatus, *Specimen* edidit *Dispõs- tionis*, ubi stultissimè adversùs Sedem Apostolicam insa- niit. Sed hæc insania novo specimine exhibenda est.

SPECIMEN XVIII.

Stejartii in Sedem Apostolicam contumelia, mina, insania.

NIl dici potest in Sedem Apostolicam contumeliosius, quam quòd favore & studio partium causas iudicet, libros proscribat, Brevia & Decreta condant. Atqui hæc ipsi exprobrat Stejartius: *Nimirum, inquit, favet istis Roma ad invidiam: Omnia ipsis contraria passim proscriberat; nihil penè quod ipsorum esset aut putaretur: Quos ipsi soluerant; ad Urbem gravissimo imperio evocati erant: Brevia unquam, ut vocant, & Decreta obtinuerant &c. In Specimine Dispositionis pag. 9.*

Addit minas terribiles, & dum illi non favet Roma, ipse e causam suam domi decisurum relicta Româ denuntiat: *Quid igitur, inquit, manum tollemus de tabula? Planè.... Alia est medicina domestica, & non tam procul repetenda; quam utinam ab initio fuisset adhibita! Neque nos tantum laboris & impensa, neque Roma ipsa tantum molestia pertulisset... Ad principium redeundum est, unde non sine errore digressio facta fuit. Ibidem pag. 13.*

Tandem concludit votis insanis, quibus iterum minas immiscet: *Quod si fata Deum, si mens non lava fuisset, quot summis, quot laboribus & turbis paritum non erat hac tam facilitatione... planè adhuc ea via aperta est, magna utique & civilis. Et hæc Vicarius Apostolicus in Sedem Apostolicam. Liceat nobis hinc uti verbis, quibus ipse in eodem Specimine immeritò utitur in Belgas Theologos: "Nequitia & superbia eorum qui te oderunt; Sedes Roma Petri; ascendis semper, etiam te retribuente pro odio gratiam & indulgentiam." Pag. 12. Nisi fortè ultra hæc, quò ascendat, invenire amplius non possit Stejartius.*

SPECIMEN XIX.

Stejartii in Ministros Regios & Regem injuria.

Frustrâ expectas, ut pareat Regi, qui Summo Pontifici non pareit. Causas in Consilio Brabantie habuit Stejartius; sed numquam bonas. Hinc semper illi aut cum de de-

dedecore componendum, aut cadendum. Vellet tamen Ministris Regiis persuadere, causas suas justas esse: Quod dum non potest, apertè illos injustitiæ accusat, ausus aliquando nonnulli ex ipsis exprobrare in faciem, *Sperandam non esse à Consilio Brabantia justitiæ-administrationem.* Hæc verbo

Sed scripto ipsa jura Regia, jure Divino & humano stabilita, invasit. In *Appendice* ad Wiggers, & rursus in *Thesi* defensa 3. Junii 1698. hanc De Vectigalibus doctrinam palam tradit: *Si quis de iis tantum substraxerit, quantum bonâ fide existimat se plus aquo supra sui similes gravandum, si totum solveret, putamus non peccaturum ejusmodi, neque ad restitutionem obligandum.*

Thesim hanc Supremus Brabantia Senatus tamquam scandalosam, & obsequio Sux Majestatis, ejusque Statibus ac Publico perniciosam proscripsit die 11. Julii 1698.

Neque proscripsit tantum, sed & solemne proscriptionis Decretum, in quo Doctoris Steyart nomen expressum erat, per omnes Brabantia Civitates palam affigi jussit; admirantibus omnibus Divinam justitiam, quâ vindicante is; qui in tot innocentium famam apud Regem & Pontificem toties tot calumniis palam grassatus fuerat, nunc per ipsum Regem coram Orbe toto infamiâ publicâ notabatur.

Neque hic stetit Senatus Brabantia, sed insuper eum citavit, ut vel coram ipso Senatu, vel coram Procuratore Generali personaliter (quod non nisi ex gravissimis causis & cum infamia sit) personaliter, inquam, seu PEDE LIGATO, ut aiunt Practici, responderet. Quo reatu in hunc usque diem nondum solutus est.

SPECIMEN XX.

*Steyartii à via antiqua & arcta Evangelii ad viam novam
& latam aberratio.*

TRibus hoc Specimen exemplis confirmabo; sed adeò illustribus, ut nemo deinceps dubitaturus sit, quin Novator & Laxo sit Steyartius. Atque en tibi primum.

Angusta porta (Luc. 13. v. 24.) *est porta Religionis Christianæ, etiam quatenus à vulgo Fidelium (ne ad nescio quos rigores restrictio fiat) observatur.* In Thesi defensa 26. Julii 1695.

Quid poterat directius Evangelio opponi? Interrogabat Christum quidam: *Domine, si pauci sunt qui salvantur?* CHRISTUS autem dixit ad illos: *Contendite &c.*

STEJARTIUS verò: Sufficit si observetis Religionem Christianam, sicut ea *observatur à vulgo Fidelium*; adeoque non est quod *contendatis*. Vulgus enim Fidelium non contendit.

Dixit CHRISTUS: *Contendite intrare per angustam portam.*

STEJARTIUS: Satis est si intretis per eam, per quam intrat vulgus Fidelium, quæ adeo angusta non est.

Dixit CHRISTUS: *Quia multi, dico vobis, querent intrare, & non poterunt. Multi utique ex Fidelibus*: nam hi soli dici possunt *querere*.

Ego verò, inquit STEJARTIUS, dico vobis: Quia intrabit vulgus Fidelium, adeoque multi; etiam si (ut vulgus Fidelium solet) intrare vehementer non querant.

Dixit iterum CHRISTUS Matt. 7. *Intrate per angustam portam.*

STEJARTIUS: Intrate per portam, per quam intrat vulgus Fidelium.

CHRISTUS: *Lata porta & spatiosa via est qua ducit ad perditionem, & multi sunt qui intrant per eam.* Ibidem.

STEJARTIUS: Et si lata & spatiosa sit, non tamen per eam intrat vulgus Fidelium, adeoque nec multi.

CHRISTUS: *Quàm angusta porta & arcta via est qua ducit ad vitam, & pauci sunt qui inveniunt eam!* Ibidem.

STEJARTIUS: Inveniunt eam omnes, qui Religionem Christianam observant; ut ea *observatur à vulgo Fidelium*; ac proinde non inveniunt eam pauci.

Quid etiam dicere potuisset directius contra unanimem consensum Patrum? Apud hos enim tam constans doctrina est, paucos ex Fidelibus salvari & angustam portam intrare, ut Estius in lib. 1. Sent. Dist. 41. post varios Patres

tres allegatos pronuntiet : NEC OMNINÒ QUISSQUAM PATRUM INVENITUR, QUI DIVERSUM SCRIPSERIT.

Quid tandem dici poterat laxius ? Nam hoc principio limites omnes, à Christo, ab Apostolis, à Patribus fixi evertuntur. Si enim sufficiat Religionem Christianam observare, ut eam observat vulgus Fidelium ; jam non amplius quid veritas, quid Christus, quid Apostoli, quid Patres jubeant, quærendum erit ; sed sufficiet intueri normam, quam tenet vulgus Fidelium, & juxta illam vitam instituere ; adeoque & illam pro regula habere.

Alterum est, doctrina quæ sequitur :

Per se atque ut communiter fit, ebrietas est gravior fornicatione. Doctor Steyaert in *Declaratione* ad Art. 8., inter Articulos oblatos.

Atqui, subsument passim omnes, *Ebrietas per se atque ut communiter fit* (ob delectationem scilicet potùs) adeò gravis non est : Ergo &c.

Quæ hinc formidanda non est Reipublicæ & Ecclesiæ perniciēs ? Ponderavit eam utcumque Opstratus in EXHIBITIONE DOCTRINÆ &c. Art. 4. sed satis ponderari non potest. " Videmus, inquit, nunc gregatim combibones
" tabernas frequentare, & inebriari ferè quotidie solâ potûs dulcedine pellectos : quid ab his expectandum putet, ubi intellexerint ebrietate leviorē esse fornicationem ; nisi ut tabernas vertant in lupanaria ? ... Neque difficile ipsis erit, honestas alioquin virgines & matronas... in libidinis suæ consensum pertrahere ; si modo ipsis persuaserint, ne ebrietati quidem fornicationem æquiparari. Porro cū fornicatione multò leviores sint cogitationes morosæ, aspectus, tactus, oscula, & familiarior cum altero sexu conversatio ; quid metuas, nisi ut deinceps ferè sine scrupulo uterque sexus turpiter illis indulgere incipiat ? Horreo cogitare, quòd dogma istud palam verbo & scripto promulgatum sit coram Academicis... Non immeritò ego metuendum puto, ne plures Adolescentes Academici, qui cupidita-

"tem tabernas frequentandi ac potandi hætenus vice-
 "runt, audito hoc dogmate, vincantur à cupiditate fre-
 "quentandi loca inhonestiora, & dum alii se potu ine-
 "briant, ipsi, scilicet minùs Rei, detestabili crimine
 "corpus & animam commaculent. At quid de tot Theo-
 "logiæ Alumnis, Clericis, Sacerdotibus, qui dogma istud
 "ab ore Steyaert exceperunt, tantò fortassè avidius,
 "quantò suaviùs carni blanditur? Quàm vereor ne &
 "ex his plures infelicitè jam lapsi sint, & lapsuri dein-
 "ceps, ubi extra Academiam libertati suæ redditì, &
 "plura castitatis pericula invenient, & illecebras fortio-
 "res, & faciliorem explendæ libidinis opportunitatem.
 "Quæ verò animarum strages ab illis metuenda, dum se
 "Confessionibus, tum virorum tum mulierum, excipien-
 "dis dare cœperint, aut ad curam Pastoralem pervenerint?
 "Ubi prætextu officii adimplendi agere poterunt nego-
 "tium impuritatis, & hoc solum dogmate proposito, ad-
 "ditâ Doctoris Stejartii auctoritate, animas instabiles ad
 "facinoris illius consensum pellicere? Væ autem Eccle-
 "siis illis, quarum cura Directoribus hujusmodi committi-
 "tur. Ubi enim semel in Parochia innotuerit, à Pastore ipso
 "fornicationem ebrietate leviorè haberi; quis non me-
 "tuat, ne obscœnitatibus & fornicationibus impleantur,
 "omnia, quin & ipse in criminis illius suspicionem ve-
 "niat? Præsertim, si potui addictior sit, aut visus non-
 "numquam bibisse liberaliùs, aut minùs circumspècta
 "ipsi sit cum ancilla aut aliis mulieribus conversatio. Fa-
 "teor hæc & hujusmodi me sine horrore cogitare non
 "posse." Hæc Opstratus. Addo ego, nec sine lachry-
 "mis videre, castissimos hætenus Scholæ Lovaniensès pa-
 "rietes dogmate tam fœdo conspurcari.

Tertium est non minùs castis auribus abominandum
 de Sacerdote lapso: *Sacerdos aliàs bonæ vitæ, per extraor-
 dinariam tentationem eadem nocte in fornicationem lapsus, ab-
 solvi, mitti ad Altare, & celebrare potest manè, si aliàs plebs
 die Dominicâ Sacro frustranda foret. Vide Declarationes Do-*

Storis Steyaert ad *Art. 31. & seqq. inter Articulos Oblatos.*

Scilicet parum erat fornicationis horrorem abstulisse laicis; nisi & auferretur Sacerdotibus, & quidem manè celebraturis. Cum enim hos posset differendæ saltem absolutionis timor à crimine isto compescere; planè non intelligo, cur hunc etiam voluerit remove.

Et quid, quòd Sacerdoti non semel tantum in mortalia lapsò sed & in eadem relapsò sæpius, vetet simili casu absolutionem differri? *Non est*, inquit, *differenda absolutio Sacerdoti, qui in eadem peccata mortalia sæpius relapsus est, si obligetur ad celebrandum, puta si sit Parochus, & nisi celebret, Parochiani non poterunt interesse Sacro die festo.* In *Aphorismis De Pœnit. §. 16. n. 4.* Ubi jam non de Sacerdote, aliàs bonæ vitæ, aut de lapsò per extraordinariam tentationem; sed de aliis etiam loqui videtur, ut patebit *Aphorismos* loco citato inspicienti.

Quis credidisset ad hæc tam nova & tam laxa delabi potuisse Stejartium; tam aliquando veritatis avitæ & rigoris Evangelici amantem? Sed hoc admiranti dicebat nuper Vir quidam Sapientissimus: STEYAERT DESERUIT VERITATEM, ET A VERITATE DESERTUS EST. *Revelatur enim ira Dei de Cælo super omnem impietatem & injustitiam hominum eorum, qui veritatem in injustitia detinent..... Quia cum cognovissent Deum, non sicut Deum glorificaverunt, aut gratias egerunt: sed evanuerunt in cogitationibus suis, & obscuratum est insipiens cor eorum: Dicentes enim se esse sapientes, stulti facti sunt.* Rom. 1. Absit tamen ut ullum crimen ex iis, quæ illic commemorat Apostolus, adscribam Stejartio: solas tenebras intellectûs, quas ipse foris per dogmata tam tenebrosa prodit, verbis Apostoli describo.

Ad utramque Mundi Potestatem

CONCLUSIO.

E*T nunc Reges intelligite, erudimini qui iudicatis terram.*
 FIDEM Theologorum Belgarum adversus MENDACIUM NOVUM, quod illis impegerat Stejartius, vindicavi : Mendacii Impactorem fide omni indignum esse ostendi. Reus est calumniarum circiter quadraginta in Huygenium, ejusque Adhærentes & Confœderatos : Reus calumniarum in Patres Oratorii Montensis : Reus calumniarum in Clerum Diœcesis Mechliniensis : Reus calumniarum in Viros integerrimos, nominatim expressos in *Jansenismo* : Reus calumniarum in Theologos Lovanienses, quos in Thesis & Lectionibus vexat quotidie : Reus calumniarum in Opstratum, aliosque, ac recentissime in Doctorem Renardi, quos persequitur : Reus falsorum testimoniorum, quibus Theologos Potatores, Fumatores, & Lufbres, tamquam probos moribus, ad S.S. Ordines & Curam Animarum promovit : Reus negati testimonii & motæ persecutionis in eos, qui præ cæteris modesti erant, & officio suo ac pietati addicti : Reus turbarum per annos plures excitatarum in Academia Lovaniensi ; Reus excessuum enormium in docendo : Reus sprete Magnificentie Rectoralis super excessibus eum admonentis : Reus fractæ fidei, Rectori Magnifico propria manu datæ : Reus novorum excessuum, ob quos iteratò ei docere interdictum fuit : Reus attentati contra Interdictum, & Portæ Scholarum publicarum vi & malleis effractæ : Reus assumpti sibi honoris & Insignis Rectoris Magnifici, ejusdemque Throni viâ facti per Fabrum ferrarium sibi aperti & conscensi : Reus calumniæ in Eminentissimum S. R. E. Cardinalem AGUIRRIUM : Reus labis aspersæ nomini ac memoriæ pientissimi Cardinalis BONA : Reus suspicio-
 num

num nigerrimarum, quas affixit purpuræ Cardinalis CASANATE: Reus rumoris sparsi de Aula Romana, quasi pecuniis & muneribus corrupta foret per Hennebellum: Reus crebræ in Sedem Apostolicam inobedientiæ ac rebellionis: Reus contumeliæ, minarum, insanix in eandem: Reus injuriæ in ministros Regios, & Juris Regii violati: Reus, *pede ligato*, cum infamia citatus: Reus novorum & laxorum dogmatum, quæ ipsa Moralis & vitæ Christianæ fundamenta ac sanctitatem evertunt.

Post hæc omnia finite ut dicamus, Sapientissimi Principes, mirari Orbem universum, quæ fieri possit ut homo ejusmodi tantam apud utramque Potestatem auctoritatem & fidem obtineat. Non hanc illi invidemus; sed an nobis saltem concedi non debeant tria hæc, quæ humillimè supplicamus, pro Vestra Sapientia judicate.

1. Ut Accusator noster, qui hætenus, etsi sæpius provocatus, ne unam quidem e tot calumniis probavit, condemnatur tamquam infamis, pœnâ talionis plectendus, & ad accusandum non admittendus amplius, juxta hos Canones:

Si quis circa hujusmodi personas non probanda detulerit; auctoritate hujus Sanctionis intelligat se jacturam infamix sustinere, ut damno pudoris & existimationis dispendio discat, sibi aliena verecundia impunè insidiari saltem de cætero non licere. 2. q. 3. c. 1.

Calumniator, si in accusatione defecerit, talionem recipiat. Ibid. c. 2.

Placuit, ut quotiescumque Clericis ab Accusatoribus multa crimina objiciuntur, & unum ex his, de quibus prius egerint, probare non valuerint, ad cætera jam non admittantur. 4. q. 10. c. 1.

Nisi enim in usum reducantur hi Canones, numquam in famam innocentium grassari desinet calumniandi libido, quæ se impunè grassari posse intellexerit.

2. Quod si pœnam in Accusatorem decernere Clementiæ,

tiae Vestrae, Supremi Orbis Principes, nondum visum sit; hoc saltem enixissimè rogamus, ut nulla ipsi super accusationibus fides adhibeatur, donec apertâ nobis viâ iustitiæ, & dato defensionis loco, constiterit legitimè, an ipse tot calumniarum, an nos tot criminum Rei simus.

3. Ut juxta Breve Apostolicum datum à Sanctissimo D. N. Innocentio XII. 6. Februarii 1694. atque à Rege nostro, Catholico executioni in Belgio mandari jussum, non habeamur ut Rei & ab officiis ac muniis omnibus excludendi, nisi prius eam poenam, qua Viris certè Catholicis gravissima est, nos commernisse, servato juris ordine, probatum fuerit.

Enimverò si ob solas accusationes quis Reus sit & excludendus; jam multò minùs Rei aut excludendi sumus nos, quàm Stejartius; idque non uno ex capite. I. Quòd dogmata aut facta plurima, de quibus ipse accusat nos, nostra esse negemus, paratique simus ostenderè ea nobis per calumniam affingi: Ipse verò facta, de quibus nos accusamus ipsum (puta Accusationem 42. Articulorum, Accusationem quam intentat in Epistola Pastoralis, in suis Thesis &c. item dogmata, de quibus suprâ Specimine XX.) sua esse nec neget, nec negare possit. II. Quòd si de facto aut dogmate aliquo tamquam nimis rigido accuset nos, quod nostrum esse agnoscimus, illud minimè comparari possit tot factis calumniosis & dogmatibus laxis, quorum vel unum (puta de porta angusta aut fornicatione) perniciem suâ vincit rigores omnes, quos nos tenemus; etsi reverà (quod non existimamus) excessûs aliquid in iis contineretur. III. Quòd multò magis de novitate accusetur à nobis ipse, quàm ipse de novitate accusare possit nos. Ubi enim, non dico in Sacris Litteris aut Sanctis Patribus, sed vel in laxissimis Casuistis, umquam auditum est; *Portam angustam*, de qua in Evangelio, esse portam Religionis Christianae, prout ea à vulgo. Fidelium observatur? Ubi tandem cogitatum, Ebrietatem per se & ut communiter sit, fornicatione.

tionem esse gravionem? Atqui hoc tandem cogitavit Stejartius.

IV. Quòd si fortè dogma aliquod nimis rigidum aut novum ignorantes teneamus, jam inde subjiciamus omnia iudicio Sedis Apostolicæ, erga quam jam antè sæpius sinceram nostram submissionem reipsâ probavimus: Ipse verò, qui non minùs quàm nos errare pòtest, debitam Sedi Apostolicæ reverentiam ac obdientiam non semel violaverit; ac proinde meritò timeri possit, ne si doctrinam ipsius Roma damnet, pecuniis aut nummis damnationem obtentam esse dicat, aut de studio partium & favore ad invidiam Romanam accuset.

HEM LECTOR.

Penè exciderat. Quæstus est nuper in Scholis publicis Stejartius, se à *Belgis Theologis*, absque titulis *Stejartium* vel *Doctorem Steyaert* appellari. Protestamur, id non contemptûs, sed brevitatis gratiâ à nobis factum; quemadmodum ubique compellamus *Huygenium*, *Hennebellum*, *Doctorem Huygens*, *Doctorem Hennebel*, relicto titulo, *Eximus*. Tamen ut omnis querelæ ansa tolatur, declaramus coram omnibus, velle nos, ut ubicumque nomen *Stejartii* vel *Doctoris Steyaert* posuimus aut posituri sumus deinceps, subintelligantur tituli omnes, quos ipse sibi tribuit & insculpi iussit monumento, quod sibi nuper Lovanii in Templo Divi Petri, loco ante Chorum principalem amplissimo, crexit. Ubi etsi tituli isti omnibus, qui Lovanii morantur, conspicui sint; tamen ut & exterios legant, ipsum lapidem sepulchralem titulis suis gravem hinc exhibemus.

D. O. M.
MARTINUS STEYAERT

SOMERGHEMIUS,

S. Th. DOCTOR & PROF. REGIUS,

COLLEGII MAJORIS THEOL. PRÆSES,

VICARIUS GENERALIS

APOSTOLICUS

DIOECESIS SYLVÆDUCENSIS,

HUJUS ECCLESIAE CANONICUS

ET DECANUS.

PRIVILEGIORUM ACAD. CONSERVATOR

HUNC LAPIDEM

RENOVATI PAVIMENTI PRIMUM,

Sibi supremus ut esset,

P O S U I T.

Anno Dom. DIC IDC XCIX.

ÆTATIS LIII.

Obiit

Requiescat in pace.

